

十駕齋新录

十駕齋新錄

序
唐宋以來名公巨卿皆有年譜然必爵位功業道德文章炳
曜一世而又克享大年則及身自爲之而無忝後學代爲之
而足徵與國之史傳家之世系可互相參攷者也唐香山居
士白文公自編長慶前後各集并以年譜今集中所刻出於
陳伯玉李德劭之手則公自編之譜久已散佚然公之年齒
官階時事出處一見諸詩集讀其詩而年譜卽在其中矣
嘉定錢竹汀宮詹甫晬能言母沈太恭人指玉而二字教之
試以他書指認不誤與香山之生七八月乳母抱立屏下指
之無二字百試不差者正同豈非文人偉業異世相符者乎

先生鍾光岳氣完之運立

堯舜賡歌之延年甫及艾養疴里門雖位止九卿功業未顯而道德文章中外仰之如泰山北斗著述之富網羅百家沾漑藝苑高麗使臣在都購其詩文集鬻諸國中與香山之日本新羅鈔寫其本者亦復相似故翼謂先生卽我朝之白傳也歲在庚申獲交先生從孫直卿學博以先生年譜見示王子以前先生自撰後十二年其曾孫又沂學博補編受而讀之知先生少壯時所親炙者先達名流而後之同年儕輩門生新進皆鴻博之碩儒詞章之宗匠尙論者可想見當時國運之隆人才之盛而先生令名壽考全受全歸此又名公

卿年譜中所罕覩也憶嘉慶壬戌先生重游泮水翼年十四
歲不獲親瞻道範及與令孫竹孫學博同歲游泮禮宜晉謁
門下而哲人已萎徒深歎慕迄今天假之年龍鍾未死猶得
腆顏泚筆附名於一代大儒之譜末是則厚幸也夫咸豐十
年陽月旣望寶山袁翼謹撰於豫章郡寓齋時年七十有二

錢辛楣先生年譜

曾孫慶曾校注

竹汀居士年譜

手編自題

謹案公諱大所字曉徵一字及之號辛楣又號竹汀居士姓錢氏先世鳳里公諱鑑明正德間自常熟雙鳳里贅嘉定之盛涇管氏遂世居嘉定先世譜系所自遷嘉時已失不可攷鳳里公生北郊公諱浦北郊公生順郊公諱炳順郊公生侍郊公諱珠侍郊公生公瞻公諱岐是為公會祖

雍正六年戊申正月七日戊午戌時居士生於嘉定望仙

橋河東宅

謹案吾家自鳳里公始居盛涇再傳而析二支一居外岡一居望仙橋望仙橋鎮在縣城西十八里

先大夫年逾三十尙未得子姑夫沈組佩先生言房門

不利當閑之而別啟戶焉如其言期年而居士生

謹案高祖中憲公諱桂發字芳五號小山縣學附生以公貴封奉政大夫翰林院侍讀晉贈中憲大夫詹事府少詹事著有方壺吟橐三卷享壽七十有九生於康熙三十六年至是年三十二矣沈諱張坊新陽縣庠生居嘉定以子魁官贈奉政大夫貴州威甯州知州

七年己酉年二歲

居士甫周歲能言母沈太恭人指玉而二字教之更以他書覆試卽指認不誤晬日家人陳百物於盤居士諦

視良久惟取一筆

謹案公集奉政公家傳云甫晬卽教以識字

八年庚戌年三歲

沈太恭人歸甯攜居士至外祖宅外祖喜其慧了引詣

諸戚友家見堂上扁聯皆能成誦

謹案公外祖沈處士諱時俊居青浦之黃渡鎮

九年辛亥年四歲

十年壬子年五歲

始從塾師曾獻若先生問字

謹案奉政公家傳云此五歲授以經書稍暇卽與講論前代故事詳悉指示俾記憶勿忘乃止如是者殆十年曾公諱佳縣庠生中憲公業師

十一年癸丑年六歲

十二年甲寅年七歲

先大夫移居河西宅

十三年乙卯 年八歲

乾隆元年丙辰 年九歲

謹案是年中憲公入學公集中憲公行述云年幾強仕始受知於學使禮部侍郎桐城張公廷路三上秋闈不遇杜門課徒自給

三年丁巳 年十歲

大父奉政公館望仙橋楊氏卽從大父受業初學爲八

股

謹案奉政公諱王炯字青文號陳人縣學生鄉飲大賓壽九十有二著有字學海珠三卷星命瑣言一卷以公貴贈奉政大夫翰林院侍讀奉政公夙精小學教以訓詁音韻公能貫通大意奉政公嘗謂此子

入許鄭之室無難也

自夏至冬病疥廢學

三年戊午年十一歲

始應童子試

謹案是年邑令爲咸甯黃公建中

四年己未年十二歲

先大夫館外岡族父元禮齋從先大夫學

謹案外岡鎮在縣城西十二里元禮先生諱楷國學生與公同出北郊公

五年庚申年十三歲

仍從先大夫在外岡書齋其夏復應童子試邑尊永嘉

林公諱上梓面試大加獎賞揭案名在第六先大夫攜居士謁謝公曰令子遠大之器不必欲其速售也

六年辛酉 年十四歲

先大夫館族兄彥輝齋仍從先大夫學

謹案彥輝先生諱耀國學生與公同出順郊公又案中憲公行述初館元禮先生齋後館彥輝先生齋皆攜公自隨晨夕督課當是時舉業家皆不習詩生徒或私作韻語則父師相詆病以爲妨於制義也中憲公獨喜教公爲詩示以唐人安章宅句之法則公之始學爲詩當在此三四年間是秋中憲公赴江甯樂試公卽攝館

七年壬戌 年十五歲

是歲負笈入城從曹丹五先生學同筆硯者陸昌雅李

斗祥韓萬原徐毓洲諸君及先生之子習庵也

謹案曹封翁諱桂芳號檀濬歲貢生習庵學士名仁虎字來殷辛巳進士陸名授詩與公同入泮少年有才早世韓名本徐名瀛秀皆縣學生公詩集有徐毓洲讀書僧舍集杜詩相寄之作又嘗爲記芥舟山房見文公集卷之四

其夏復應童子試受知於學使內閣學士劉公諱藻覆

試日見居士方髫齡別置筆硯於它所試之較原卷更

佳次日復特招覆試以焉知來者之不如今也爲題試

畢獎勵甚至贈以筆墨數事公嘗語人曰吾視學一載

所得惟王生鳴盛錢生大昕兩人耳是時始與禮堂定

交外舅虛亭先生見居士文亦以爲不凡明年始有昏

姻之約

謹案劉制軍原名玉麟字素存山東荷澤人丙辰博學宏詞王封翁諱爾達字非聞歲貢生子光祿諱鳴盛字鳳咭號禮堂又號西莊公同年進士及第官內閣學士兼禮部侍郎左遷光祿寺卿早年與公齊名人稱錢王

八年癸亥年十六歲

仍假館曹氏

謹案曹封翁自外岡徙居城東顏其堂曰蓉鏡公乞假歸里時曾為作記見文集

九年甲子年十七歲

學使開公泰科試取一等第七名

謹案開制軍字兆新號敬庵庵滿洲正黃旗人甲辰進士時官兵部侍郎

是秋鄉試始與王蘭泉定交

謹案王少司寇名和字琴德號蘭泉又號述庵公同年進士居青浦縣之朱家角里又案是年十月公弟

可廬先生

十年乙丑年十八歲

始授徒塢城顧氏其家頗藏書案頭有資治通鑑及不全二十一史晨夕披覽始有尙論千古之志讀東坡戲作賈梁道詩輒援晉書以糾其失中年見浙中新刊查注蘇詩已先我言之然居士年未弱冠攷據已有與前輩闇合者矣

謹案塢城在縣城東南四十里諸生顧公我澗公亞壻也是年延館其家公辨正蘇詩誤以司馬懿爲司

馬師見養新錄卷十六

十一年丙寅年十九歲

仍授徒顧氏

讀李延壽南北史鈔撮故事為南北史雋一冊

謹案家藏公手書冊子十餘幅皆節錄南北史語并記云舟中攜有此書錄出數則以備兒輩遺忘蓋公少年篤好此書大半能成誦故取以為傳家之學

十二年丁卯年二十歲

是秋應江甯鄉試同考官廣德州知州歷城曾公尙增

得居士卷奇之薦主司不見售

謹案公壽邵松阿舍人七十詩云同出南豐一瓣真自注君鄉試出長清曾公房予出曾公薦為試官所

十三年戊辰 年二十一歲

四月學使尹公會一歲試取一等第六名

謹案尹公字元孚直隸博野人甲辰進士時官工部侍郎

八月祖母朱宜人歿

謹案朱宜人處士德臻公女年八十有二中憲公恪遵家法不作佛事

十四年己巳 年二十二歲

巡撫覺羅樛軒公雅爾哈善聞予名檄本縣具文送紫

陽書院肄業時侍御王艮齋先生爲院長閱居士課義

詩賦論策歎賞不置曰此天下才也自是課試常居第

一青浦王蘭泉長洲褚鶴侶左莪及禮堂習庵皆在同舍以古學相策勵吳中老宿李客山趙飲谷惠松厓沈冠雲許子遜顧祿百亦引爲忘年交

謹案公作習庵先生墓志檇軒作檇亭侍御諱峻字次山常熟人甲辰進士鶴侶舍人名寅亮公同年

召試賜舉人左莪學士名廷璋癸未進士李布衣名果趙徵士名虹惠徵士名棟沈徵士名彤許大令名廷鏞顧上舍名詒祿惠長於

公三十餘年沈長於公四十年

又案先是王少司寇肄業紫陽書院與王光祿同舍始知公幼慧善讀書有神童之目及院長詢以今日人才則以公對院長轉告巡撫巡撫喜甚招公至院試以周禮文獻通攷兩論公下筆千言於是驚異院中諸名宿莫不斂手敬之

十五年庚午 年二十三歲